

CE SONT LES ORDONNANCES ANCIENNES DES CONFRÈRES DE LA
CONFRARIE MONSEIGNEUR SAINT-JAQUE.

Premiers, que tout li confrère qui seront en le ville de Tournay le jour Saint-Jaque soyent tout a le cloque des ouvriers, al hospital Saint-Jaqueme pour envoyer le candelille au moustier saint et demetrent tout pour oïr le messe. Et puis après revienngent al hospital Saint-Jaques, ainsi qu'il est acoustomé.

Item, qu'il ne soit donné blanche coroe ne blanche verghe, fors as confrères de le confrarie Saint-Jaqueme.

Item, que nul ne soit rechens en le dite confrarie qu'il soit de maise renommée, de nul diffame et qui ne puissent souffrir les frais de ledite confrarie. Et si est assavoir que tout cil qui seront rechut soient rechut par le conseil des xij qui seront pour le temps eslut ou par le plus grant partie.

Item, que nuls ne soit rechus qui ne paiece lx solz tournois pour l'entrée et v solz iij deniers maille tournois pour le mengier, si comme li autre, et qu'il promaiche lesdis v solz iij d. maille a payer escun an, se povra les ne ly fait destourner ou il soit demourans hors de le voir de Tournay.

Item, pour ladite confrarie amaintenir a l'honneur de Dieu et de Monsieur saint Jacques, comment que il ait esté ordonné que tout li confrère soient tenu de payer v solz iij deniers maille tournois pour leur disner, et que cil qui n'y estoient povoient envoyer querre leur esquielle, s'il sont malade ou dehors la ville, ilz l'aront, mais que cescun envoieche v s. iij d. maille tournois. Et chuis qui seroit en le ville haitiés n'aroit mie l'esquielle et se paie-roit les v s. iij d. maille tournois. Et pour chou tout cil qui ne seront au disner ne seront mie quitte de payer les v s. iij d. maille tournois.

Item, que ly doy eslat en cescune paroice, pour l'année, soient tenu de recevoir les v s. iij d. maille tournois dessusdis a leurs confrères en leurs dites paroiches. Et ou cas qu'ils seroient rebelles dou payer, il soient mis hors de ladite confrarie.

Item, que li xij getteront cescun au los pour savoir ou cescune paroiche sera assise au disner, et que nulz des confrères ne sièche, fors en sadite paroiche là ly noms de le paroiche sera mis sur paine de ung lot de vin.

Item, que li xij qui seront eslut pour le temps soient tenu de faire faire le candaille et les pignousecheaus et ordonnent chiaux qui porteront ledite candaille, et qu'il soient tenu de prendre iiij trompeurs au fait des pelerins et nient plus pour ledite journée, et à tous autres menestreulx soient donné congié.

Item, que li xij qui seront pour le temps soient tenu de servir au disner leditte journée et de prendre varlés abilles pour yaulx aidier, et qui soient tenu que ly doy des xij soient au dreschoir, ung à le boutellerie dou vin, ung à le panetrie, et li vj soient establitz pour assir cescun à se paroiche, et li autre doy soient pour regarder par les tables se il y fault aucune chose et pour faire assir quant il sera temps.

Item, que ledis xij viez soient tenus après disner de assembler leurs paroiches pour eslire les xij novviaux et s'il ont aucune chose à ordonner qui soit au pourfit dudit hospital, qu'il en soit parlet devant tous ledis confrères.

Item, que ly xij viez, al après disner, soient tenu de compter et de paier les dépens qui seront fait pour ledit journée et qu'il soient tenus d'avoir appareillies leurs comptes tous près pour lendemain dou jour saint Jaque y estre à le cloque des ouvriers audit hospital pour rendre compte de l'année as xij novviaux.

Item, qu'il soient tenu li xij novviel de eslire ung preud'homme d'entre yaulx pour recevoir l'argent tout qu'il vendra en ledite année d'apport oudit hospital, de quel part que soit, et qu'il soit tenus lidis receveres de payer les frais qui appartenront audit hospital pour ledite année et de rendre compte.

Item, que li xij qui seront pour le temps soient tenu que le journée que on rendra les comptes d'establir personnes bonnes et souffissans qui soient pourfitable pour faire les pourveances doudit hospital pour l'année et soient tenu de establir une personne pour rentes et hostaiges et dons recevoir doudit hospital et qui prengne l'argent au receveur.

Item, que tout li confrère doudit hospital qui se remue-
ront d'une paroice en une autre soient tenu de venir au
clerc doudit hospital et yaulx faire mettre en le paroiche
là où il seront demourant, sur paine de ung lot de vin.

Item, s'aucuns confrères trespasse de ce siècle, que li
semonneur facent semonce d'i estre au corps les confrères
et tous les defalans ni ne seront as vegilles et à le messe
soyent deswagiet de v d. tournois, dont ly semonneur
aront l'un denier et les autres iiij deniers reverront au
pourfit doudit hospital. Et si est assavoir que ly doy de le
paroice esleus pour l'année puissent commander aporter
le corps et le drap à chiaus qu'il venront que bon sera
desdis confrères, sour le paine de ij los de vin, et que ly
semonneurs les en puissent deswagier et lidis argens
viengne au pourfit dudit hospital.

Item, s'aucuns débas avenist qui fuist entre lesdis cou-
frères là où ne fu sangs ne plaie ouverte, que li xij qui
seront pour le temps il le puissent apaisier, et chou qu'il
en sera ordonnet par le plus grant partie d'cauls soit
tenu par le serment, sauf le droit de la ville et du roy
nostre sire.

Item, qu'il soit mis en ung rolle les debtes viées dou
disner et de toutes autres promesses que se tout cil qui
doivent n'ont payet devers Noël prochain venant après
il soient mis hors de la confrarie ou il prendront sour
leur serment qu'il ont payet. Et pour chou ne sont-il mie
quitte qu'il ne payassent.

Item, qu'il soit mis en ung coffre et ou ferme dudit
hospital tous les escripts, previléges et papiers et toutes
autres escriptures et enseignemens qui appartiengnent
et appartenront pour ledit hospital, duquel coffre ou
ferme y aura clef que garderont les deux souverains des
xij de l'année qui seront pour le temps.

Item, que se aucuns pèlerins de la confrarie aloit à saint
Jaques et il vouloit mander as ij des xii de le paroice que
ferme y aura clef que garderont les deux souverains des
xij de l'année qui seront pour le temps.

Item, que se aucuns pèlerins de la confrarie aloit à saint
Jaques et il vouloit mander as ij des xii de le paroice que
tout cil de le paroice alassent contre lui sour ung lot de
vin et se heuque ou se cloque seroit al hospital.

Item, se aucuns pélerins trespasent, li hospitaux doit avoir son meilleur warnement ou l'argent qu'il vauroit se on le vouloit racater.

Item, se aucuns des confrères ne vousissent tenir les ordonnances qui seront confremées et il se vousissent déporter d'i estre en le confrarie, faire le pœent, car ou cas où il seroient défailant desdittes ordonnances tenir, ou les metteroit hors à tous jours.

Item, fu accordé en l'an mil ccc. lxxvij, le jour saint Jaques et saint Christoffe, au matin, quant li confrère furent venit pour porter le candoille en le paroiche Saint-Jaques, par toutes les paroices et de commun assens, que jamès nuls ne peüst estre des xij qui sont pris le jour saint Christoffe pour entendre as besongnes de le maison toutes les fois qu'il en sont requis, se il n'ont fait le voyage au baron en Galisse dou leur, à piet ou à cheval. Et chius assens et accors fu démontrés as xij personnes qui estoient pour le temps, à le requeste de tous les confrères, par le bouche seigneur Piéron le Muisyt.

Toutes lesquelles ordonnances sont contenues et escrip-tes oudit anchien cartulaire en date de l'an de grace mil ccc. cinquante et ung.